

Prijs di awa y coriente lo sigui subi

Proyecto di molina di biento ta inevitable

ORANJESTAD (AAN) Prijs di awa y coriente a bolbe subi y teniendo cuenta cu riba mercado internacional por lo pronto e prijs di petroleo lo keda uno bao tension grandi, e posibilidad ta grandi cu durante e aña aki mes, prijs di awa y coriente lo sigui subi mas ainda.

Cada aumento di prijs di awa y coriente debi na aumento di prijs di fuel riba mercado internacional, tardi of tempran lo bay acompaña cu aumento di prijs di gasolin y diesel y asina poco poco bida en general ta bira mas caro cada biaha.

Comercio cada biaha mester adapta su prijsnan pa motibo di aumento di prijs di awa y coriente den combinacion cu aumento di prijs di gasolin y diesel y a lo largo ta e pueblo pagador di belasting ta esun cu ta sali perhudica.

Nada por worde haci contra aumento di prijs di petroleo riba mercado internacional y esey ta un hecho cu pueblo den cierto sentido tin cu siña biba cune; pero esaki no ta encera cu no tin otro alternativa.

Den cada negoshi un comerciante cu ta maneha su compania cu vision riba futuro y teniendo na cuenta kico ta tuma lugar riba mercado, adaptacionnan ta worde haci na tempo ora cu e materia of productonan cu e comerciante tin cu vende ta bira mucho caro of te hasta impagable pa e clientenan.

Aruba no tin rieu cu fluho grandi di awa cu por worde uza pa genera coriente haciendo uso di damnan grandi manera ta worde haci na paisnan grandi cu si a haya e luho ey di naturaleza.

Hopi otro pais tambe ta sinta cu e mesun problema ey pasobra nan no tin e rikeza natural ni di awa, ni di biento, pero Aruba tin e suerte y e luho grandi di un rikeza natural cu ta biento.

Biento ta supla sea modera of duro casi henter aña y e fluho di biento na Aruba ta casi constantemente compara cu hopi otro pais of region na mundo.

Suministro di biento ta gratis pasobra esaki ta un fenomeno natural cu Aruba a worde grandemente bendiciona cune y ta pesey e momento a yega cu no ta keda nada otro cu mester bay haci uso di e rikeza natural grandi aki.

Durante ultimo dos pa tres

decada cu a pasa, varios hende y varios compania a bin cu diferente idea y proyecto pa pone instalacionnan di molina di biento na Aruba, pero te cu recientemente nada concreto a worde realiza pa definitivamente cuminsa haci uso di energia genera via molinanan di biento.

Ta conoci cu algun luna pasa tabata tin basta discusion publico encuanto proyecto di molina di biento ora un compania Aleman a bin haci presentacion pa un proyecto grandi di molina di biento na Aruba.

Tabata tin discusionnan fuerte entre esnan cu tabata pro y esnan cu tabata contra e proyecto Aleman y na un dado momento tabata tin hende cu a bay hunga politica cu e proyecto door di bay hinca miedo den WEB cu si e proyecto di molina di biento worde realiza na gran escala esaki lo encera cu hopi hende

den WEB lo perde nan trabao.

Segun expertonan, un bon proyecto di molina di biento lo bay crea mas cupo di trabao na WEB y tambe crea un specializacion laboral extra cu no tin na Aruba.

Si tabata asina mes cu proyecto di molina di biento lo encera cu sea un grupo chiquito of grandi di personal di WEB lo perde trabao, anto esaki no por worde uza como argumento principal pa no ehecuta un proyecto di molina di biento.

Pueblo mester por haya e alternativa di por haya awa y coriente na un prijs mas abao y no por bay pone interes personal di trahadornan di WEB na prome lugar pa


asina perhudica henter un pais.

Tempo cu e prome autonan a yega Aruba, e bendedornan di burico y cabay tambe no a gusta e asunto, pero interes general y desaroyo di Aruba tabata na prome lugar y ta pesey tambe e momento a yega cu sea e gobierno actual of e gobierno nobo mester bay pusha duro pa bin cu un proyecto realistico di molina di biento.

Tardi of tempran no lo keda otro alternativa cu un proyecto di molina di biento ta inevitable pa Aruba y ta pesey tanto politica como interes di algun hende of grupo chiquito mester worde hala un banda pa laga interes general prevalece.

TELEFONNAN DI DIARIO
582-6747- FAX 582-8551

BENNY TIME TO MOVE ON!!



BEST DEAL

Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455



Recuerdo di Angel
Afl. 5,95